

სიღნაღის მუნიციპალიტეტის საკრებულოს მაჟორიტარი წევრის, საკრებულოს სივრცით-ტერიტორიული დაგეგმარების, ინფრასტრუქტურისა და ბუნებრივი რესურსების კომისიის თავმჯდომარის ირაკლი ზურაშვილის ანგარიში 2022 წლის 1 ნოემბრიდან 2023 წლის 1 ოქტომბრამდე გაწეული მუშაობის შესახებ

ჩემო ამომრჩეველბო,

მოგესხენებათ, რომ უკვე ორი წელია არჩეული ვარ სიღნაღის მუნიციპალიტეტის მეხუთე მოწვევის საკრებულოს წევრად. ამავე პერიოდიდან ,საკრებულოს პირველმა სხდომამ გამომიცხადა უდიდესი ნდობა და ამირჩია საკრებულოს სივრცით-ტერიტორიული დაგეგმარების, ინფრასტრუქტურისა და ბუნებრივი რესურსების კომისიის თავმჯდომარედ, ხოლო საფინანსო საბიუჯეტო კომისიაში წევრად .

საკრებულოს წევრად ჩემი საქმიანობისას ვხელმძღვანელობ საქართველოს კონსტიტუციით, საქართველოს ორგანული კანონით „ადგილობრივი თვითმმართველობის კოდექსი“, საკრებულოს რეგლამენტითა და სხვა ნორმატიული აქტებით. შესაბამისად, საქმიანობას წარვმართავ იმ უფლებამოსილებათა ფარგლებში, რასაც ითვალისწინებს მოქმედი კანონმდებლობა. სწორედ ეს განაპირობებს ჩემს მუშაობას, რომლის მთავარი მიმართულებაა ადგილობრივ დონეზე მოსახლეობისა და საკრებულოს ინტერესების გათვალისწინება და მიღებული ნდობის შენარჩუნება.

საანგარიშო პერიოდში ჩატარდა საკრებულოს 14 სხდომა, ვესწრებოდი 14-ს. აქტიურად ვიყავი ჩართული საკითხების განხილვაში. საკრებულოს სხდომებზე ჩემ მიერ მხარდაჭერილ იქნა, როგორც საკრებულოს სამუშაო გეგმით განსაზღვრული, ასევე მუნიციპალიტეტის წინაშე დღის წესრიგში დასმული მიმდინარე საკითხები.

საკრებულოს სხდომაზე მომხსენებელი ვიყავი 19 საკითხზე, ხოლო-თანამომხსენებელი 10 საკითხზე.

ჩატარდა საკრებულოს ფრაქციის „ქართული ოცნება“ 12 სხდომა, ვესწრებოდი 12-ს.

როგორც მოგახსენეთ, საკრებულოში ვარ სივრცით-ტერიტორიული დაგეგმარების, ინფრასტრუქტურისა და ბუნებრივი რესურსების კომისიის თავმჯდომარე. კომისიის შემადგენლობა განსაზღვრულია 9 წევრით. ჩემი ხელმძღვანელობით ჩატარდა კომისიის 10 სხდომა, სადაც განხილულ იქნა სხვადასხვა ინფრასტრუქტურული საკითხები.

მუნიციპალიტეტის წარმომადგენლობითი ორგანო კანონმდებლობის შესაბამისად ანხორციელებს მუნიციპალიტეტის აღმასრულებელი ორგანოს კონტროლს. ამ მიზნით ჯერ კომისიამ, ხოლო შემდგომში საკრებულომ მოისმინა და შეაფასა ა(ა).ი.პ. „კომუნალური“ 1 -ის დირექტორის მ/შ ბერდო ასანიშვილის 2022

წლის ანგარიში გაწეული მუშაობის შესახებ. ასევე, კომისიამ მოისმინა სიღნაღის მუნიციპალიტეტის მერიის ინფრასტრუქტურის, სივრცითი მოწყობის, მშენებლობის, არქიტექტურისა და ძეგლთა დაცვის სამსახურის უფროსის გიორგი ბაღანაშვილის ანგარიში 2023 წლის 9 თვეში გაწეული მუშაობის შესახებ.

საანგარიშო პერიოდში კომისიამ აქტიურად იმუშავა მუნიციპალიტეტის მერის მიერ საკრებულოში შემოსულ ინიციატივაზე „სიღნაღის მუნიციპალიტეტის სოფლებში (ძველი ანაგა, ტიბაანი, ჯუგაანი, ბოდბისხევი, ანაგა, ვაქირი, ბოდბე, ქვემო ბოდბე, ზემო მაღარო, ქვემო მაღარო) გეოგრაფიული ობიექტების (ქუჩების) სახელდების შესახებ“ . „მუნიციპალიტეტის ადმინისტრაციულ საზღვრებში მდებარე გეოგრაფიული ობიექტების სახელდების წესის დამტკიცების შესახებ“ საქართველოს მთავრობის 2015 წლის 1 ივნისის N239 დადგენილების შესაბამისად, კომისიის მიერ შემუშავებული გრაფიკით განხორციელდა სოფლის მოსახლეობასთან შეხვედრები, რათა მათთან უშუალო კონსულტაციით ვუზრუნველვყოთ მოქალაქეთა ინტერესის გამოხატვა და აქტიური მონაწილეობა საკითხის გადაწყვეტაში. ამჟამად, სიღნაღის მუნიციპალიტეტის 11 სოფელში გეოგრაფიული ობიექტების (ქუჩების) სახელდება ფაქტიურად დამთავრებულია.

როგორც ზემოთ აღვნიშნე, ვარ საკრებულოს საფინანსო - საბიუჯეტო კომისიის წევრიც. საანგარიშო პერიოდში მონაწილეობა მივიღე კომისიის 10 სხდომაში, მომზადდა კომისიის მიერ შესაბამისი დასკვნები , რომელიც წარედგინა საკრებულოს ბიუროს.

ამჟამად, მუნიციპალიტეტის მერია მუშაობს 2024 წლის ადგილობრივ ბიუჯეტზე, რომელიც პრიორიტეტების დოკუმენტთან ერთად საკრებულოს 15 ნოემბრამდე უნდა წარმოუდგენოს. კანონმდებლობის მიხედვით, მოხდება მისი განხილვა კომისიებში და დამტკიცდება საკრებულოს სხდომაზე. მინდა გითხრათ, რომ საკმაოდ დატვირთული და საქმიანი იქნება ეს პერიოდი როგორც კომისიებისთვის, ასევე მაჟორიტარი დეპუტატებისთვის , რადგანაც ყველას მაქსიმალურად გვინდა დავიცვათ მოსახლეობის ინტერესები 2024 წლის მთავარ დოკუმენტში.

საანგარიშო პერიოდში მქონდა ინდივიდუალური შეხვედრები მოსახლეობასთან. შეძლებისდაგვარად ვეხმარებოდი მათ კონკრეტული პრობლემების მოგვარებაში. მაგალითად, მუდმივად ვახდენ მათი პრობლემებიდან პრიორიტეტული საკითხების წამოწევას წინა პლანზე, რაც ძირითადად ეხება სოციალურად დაუცველთა ერთიან ბაზაში დარეგისტრირებას, ჯანდაცვის საკითხებს, სასოფლო - სამეურნეო სავარგულებამდე მისასვლელი გზების სარეაბილიტაციო სამუშაოებს, სარწყავი სისტემის სრულყოფასა და გამართულ მუშაობას, სოფელში სპორტული მოედნების სარეაბილიტაციო სამუშაოებს.

საანგარიშო პერიოდში სოციალური დახმარების გაცემის პროგრამით სოფ.ძვ.ანაგაში ისარგებლა 74 მოქალაქემ და მათზე დაიხარჯა 38703 ლარი. კერძოდ:

1. სამედიცინო დახმარების მუხლი (50 ბენეფიციარი) – 25153 ლარი;
2. შშმ პირთა სოციალური დაცვა (3 ბენეფიციარი) – 550 ლარი;
3. განსაკუთრებული საჭიროების მქონე პირთა ერთჯერადი სოციალური დახმარება (17 ბენეფიციარი) – 2200 ლარი;
4. ომისა და სამხედრო ძალების ვეტერანთა სოციალური დაცვის მხრიდან (1 ბენეფიციარი) – 200 ლარი;
5. სოციალურად დაუცველი სტუდენტების, ობოლი და მრავალშვილიანი ოჯახის სტუდენტების დახმარება (1 ბენეფიციარი) – 600 ლარი;
6. დაზიანებული საცხოვრებელი სახლის აღსადგენად ფინანსური დახმარება (2 ოჯახი) – 10000 ლარი.

ადგილობრივ ხელისუფლებასთან ერთად ჩვენი კოორდინირებული მუშაობით სოფელში განხორციელდა რამდენიმე მცირე პროექტი:

1. გაიწმინდა სოფლის სავარგულეზამდე მისასვლელი გზების ნაწილი;
2. აქტიურად მიმდინარეობს ქუჩებში არსებული ძველი სანიაღვრე სისტემების გაწმენდა და შიდა სასოფლო გზის ნაპირების სისუფთავეზე კონტროლი;
3. ითიბება სავალი გზების გვერდულები;
4. პერიოდულად მიმდინარეობს ქედლის სკვერისა და მეორე მსოფლიო ომში გარდაცვლილთა მემორიალის დასუფთავება;
5. სოციალურად დაუცველთა დასაქმების პროგრამით მიმდინარეობს სოფლის სასაფლაოების ტერიტორიის გაწმენდა, ფანიანის სასაფლაოზე შეიცვალა შესასვლელი კარები, ქედელში კი მოხდა - მისი აღდგენა;
6. მოიხრემა სარწყავი არხის ორივე მხარეს არსებული დაზიანებული გზის გარკვეული მონაკვეთი;
7. სულ მალე დაიწყება სარწყავი სისტემის სრულყოფის სამუშაოები.

სოფ. ძველ ანაგაში 2023 წელს დასრულებული და მიმდინარე პროექტების საერთო ღირებულება შეადგენს 3 734 984 ლარს. მათ შორის:

სოფლის მხარდაჭერის პროგრამისა და ადგილობრივი ბიუჯეტის თანადაფინანსებით 2023 წლის 20 მარტს დასრულდა კულტურის სახლის ეზოს შემოღობვა და სამამულო ომში დაღუპულ გმირთა მემორიალისა და სკვერის კეთილმოწყობა, რომლის ღირებულებამ შეადგინა 45 776 ლარი. აღნიშნული პროგრამის ფარგლებში 2023 წლის დაფინანსებით დაკონტრაქტებულია იაკობ გოგებაშვილისა და წმინდა გიორგის ქუჩების კვეთაზე სკვერისა და საბავშვო გასართობი ატრაქციონების მოწყობის სამუშაოები ღირებულებით 41 299 ლარი.

მიმდინარე წელს რეგიონული განვითარების ფონდისა და ადგილობრივი ბიუჯეტის თანადაფინანსებით 314 278 ლარით დაფინანსდა ხელოვნურსაფარიანი სპორტული მოედნის მოწყობის პროექტი, რაც ითვალისწინებს 50/25 მ-ზე

ფეხბურთისა და კალათბურთის სათამაშო სივრცეს, 100 მაყურებელზე გათვლილ ტრიბუნასა და სათადარიგო მოთამაშეთა მოსაცდელ სივრცეს. ამ ეტაპისთვის პროექტი სამშენებლო მომსახურების შესყიდვის პროცესშია.

როგორც მოგეხსენებათ, სოფელში მიმდინარეობს საქართველოს მუნიციპალური განვითარების ფონდის მიერ დაფინანსებული ევროსტანდარტების შესაბამისი 80 ალსაზრდელზე გათვლილი სკოლამდელი სააღმზრდელო დაწესებულების მშენებლობა, რომლის დასრულების ვადა გადავიდა მომავალ წელს.

როგორც საკრებულოს წევრი და როგორც კომისიის თავმჯდომარე ვთანამშრომლობ მუნიციპალიტეტის სტრუქტურული ერთეულების ხელმძღვანელებთან, მუნიციპალიტეტის მერთან, მერის წარმომადგენელთან, საკრებულოს თავმჯდომარესთან, რომელთაც თქვენი სახელით მინდა მადლობა გადავუხადო სოფელში საანგარიშო პერიოდში განხორციელებული, ამჟამად მიმდინარე, დაუსრულებელი პროექტებისთვის და ვთხოვო, ანალოგიური მხარდაჭერა მომავალშიც. მიმაჩნია, რომ განვლილ საანგარიშო პერიოდში დაგროვილი გამოცდილების გათვალისწინებით უფრო აქტიური და ნაყოფიერი გახდება, ჩემი როგორც საკრებულოს წევრის საქმიანობა.

ირაკლი ზურაშვილი